

忽視嘲笑 ê 人

Siōng 要緊 ê 是 lín tiòh 知，tī 末日有一 kóa 放縱私慾 ê 人會出現來 kā lín 恥笑，講：「主應允 beh 再臨，taⁿ tī tó 位？咱 ê 祖先 lóng 死去 à，m̄-koh，tùi 創造宇宙以來，一切萬物 lóng 是仝款。」『《全民台語聖經》彼得後書 3：3-4）

Tī 早期 ê 教會，真 chē 人想講基督會 tī in 有生之年 koh 再降臨地上。In 中間一 koá 人好親像是 teh 祈求耶穌會 tī 後個月，á 是後一個聖誕節 chìn 前會 tng 來 in 中間，m̄-koh，in ê 祈禱 lóng 無得 tiòh 回應。當 chit 款 t̄ai-chì 發生 ê 時，嘲（sau）笑者 teh 恥笑基督再臨 ê 任何信仰。Chit 件 t̄ai-chì hō 彼得非常不安。

彼得 ê 回應是寫 phoe hō 信徒，kā in 講：「親愛 ê 朋友 ah，m̄-thang bē 記得 chit 件 t̄ai-chì：Tī 主 ê 眼中，一日 kah-ná 一千年，一千年 kah-ná 一日。有人想講主 teh 延 chhiân 祂 ê 應允，其實是 teh 寬容 lín；祂無 ài 有人滅亡，是 ài ták 人 lóng 悔改。」（彼得後書 3：8-9）。耶穌講無人 ē-tàng 知影祂再臨 ê 時間，甚至祂家己 mā m̄ 知（馬太福音 24：36）。

換一句話講，千喜年來臨，á 是耶穌再臨 ê 時間並 m̄ 是由人類來決定 á 是預測 ê。基督 iáu 未再臨，來結束現今世界 ê 理由是因為上帝有耐心。上帝 ài beh 留 koh khah chē 時間，thang hō koh khah chē 人得 tiòh 拯救；祂 beh hō 每一個人有機會來知影耶穌基督 ê 救恩。

雖然自從耶穌應允 beh koh 再臨，好親像已經有真久 ê 時間，總是，對上帝來講，這完全 m̄ 是一個真長 ê 時間。咱 m̄-thang 因為嘲（sau）笑者恥笑咱耶穌再臨 ê 信仰，soah hō 咱失望。咱顛倒 tiòh 保持堅強 ê 信仰，而且相信上帝知影 ták 項 t̄ai-chì siōng 好 ê 時機。

祈禱：上帝 ah，祢有清楚表明，tī 耶穌再臨以前，保持 òng 望是我屬靈成長 ê 關鍵，所以，我感謝祢提醒我，基督會 koh 再臨，即使我必須等待祂再臨 ê 時間 kiám-chhái 會比我所意愛 ê khah 久。感謝祢 ê 耐心，mā 求祢使用我來接觸 koh khah chē 需要認 bat 祢 ê 人。我奉耶穌 ê 名祈禱。阿們。

（2003.10.26）